

sawcuenh dinj

Yahbuz Caeuq Lwgbawx

婆媳之间

□Sub Dasingh/苏大星

(ciep geiz gong)

Dahyungz haeuj ranz guhbawx le, haidaeuz song meh bawx cungj ndei gangj. Caezgya youq nanz le, mauzdun yied daeuj yied lai. Mehlungz yiemz yienghneix yienghhaenx, ngoenzneix naeuz lwgbawx cawj haeux mbouj cug, ngoenzhaenx naeuz cawj byaek dwk gyu lai, song boux cungj mbouj haisim, doeklaeng gag boux gag cawj gwn, song meh bawx lumj ma caeuq meuz ityiengh, boux raen boux mbouj ndaej, boux dongx boux mbouj han.

Daeglunz gap youq cungqgyang mehyah caeuq daxmeh, lumj duznou youq ndaw fungsieng, song gyauej souhheiq, haeuj baih lawz goj mbouj baenz. Daeglunz seizseiz cungj siengj ra gihvei hawj mehyah caeuq daxmeh doxndei, aen gihvei neix daeuj daengz lo, ngoenz ndeu, Daeglunz doiq mehyah naeuz: “Raeuz dwg najlwg, daxmeh danghnaeuz guh maz mbouj deng, mwngz couh lai bauyungz lai

yienzliengh de, gaej geiq coq sim. Ngoenzrawz dwg ngoenzseng daxmeh, mwngz bang de banh baez ngoenzsang ndeu, hawj de sim’ angq, hawj de rox daengz mwngz gyaez de, mwngz aeueiq de.” Dahyungz naeuz: “Ndei, cijaeu daxmeh mbouj yiemz gou, daengz ngoenzseng de gou daeuj cawj haeux cawj byaek.” Daengz ngoenzseng daxmeh, Dahyungz dawz ndaw ranz baet ndaej seuqsaksak, daengz seiz gwn caeuz, de baij aen daiz ndeu youq henz daizhaeux, diemj aen daeng ndeu, dawz aen gaugyaeq baij hwnj gwnz daiz, dawz lab baek youq gwnz gaugyaeq, yienzhaeuh caiq bae nyaengq hong wnq. Daeglunz heuh daxmeh okdaeuj gwn haeux. Daxmeh baez raen aen gaugyaeq hung lumj aen ndoengj gwnz daiz neix, youh miz dangz miz bingj, doeksat liux bae, youh sim’ angq raixcaix. Daxmeh naeuz: “Ciuhvunz geq daengz neix, mbouj caengz guh saek baez



ngoenzseng gvaq, ngoenzneix dwg baez daih’ it lo. Daeglwg mwngz rox hauqswnh daxmeh, daxmeh sim angq lai lo.” Daeglunz naeuz: “Daxmeh, aen gaugyaeq gyaundeix youh rang-fwdfwd neix dwg bawx mwngz bae dingh guh ne.” Seizneix, Dahyungz youh bae hai densi, seiz daengz roek diemj cung, ndaw yienh densidaiz boyinhyenz ok gwnz bingzmu densi daeuj boyinh naeuz: “Baihlay dwg Dahyungz diemj diuz go hawj yahbuz de gvaq ngoenzseng, diuz go nduj dwg 《Hoh Mwngz Ngoenzseng Vaiqvued》.” Ciep daeuj couh langh yinhyoz. Dahyungz ganjnyaengq diemj lab, riengz yinhyoz ciengq go hwnjdaej, Daeglunz caeuq Dahyungz doq bek fwngz doq ciengq

go “hoh mwngz ngoenzseng vaiqvued……”, ciengq sat le hawj daxmeh boq lab. Boyinhyenz youh naeuz: “Diuz go daihngieih dwg 《Gwnzbiengz Cijmiz Daxmeh Ndei》.” Yinhyoz youh hoengz hwnjdaej, song gvanbaz youh riengz yinhyoz ciengq go. Ciengq go sat le, Dahyungz gvej gaiq gaugyaeq cuengq ndaw bat, song fwngz ndenq hawj yahbuz, yahbuz cieq aeu gaugyaeq seizde, raemxda sawqmwh lae roengzbyoegbyoeg.

Daj seizhaenx hwnj, daxmeh cij rox lwgbawx ndei, lwgbawx hix rox daxmeh mbouj yungzheih. Song yah bawx doxgiet doxgyaez, daengx ranz vunz doxhuz doxndei, vuenyungz dangqmaz.

(sat)

Doengzhag Donhcieuh Cingz

同学半世情

□Lanz Han’gvangh/蓝汉光

Mbwk: Daengq beix geij yungh heiq, Cuengq cibngeih diuz sim; Nuengx daj saeq daengz hung, Caengz deng vunz gangj gvaq.

Beix daengq coenz youh coenz, Nuengx nyinhcaen goj geiq; Daengq beix geij yungh heiq, Cuengq cibngeih diuz sim.

Mbouj dwg gou gangjboq, Ndwi byaij gvaq lohrumz; Nuengx daj saeq daengz hung, Caengz deng vunz gangj gvaq.

Sai: Suenq nuengx aeu simsaeh, Ngoenzneix dauq daeuj caz;

Ndi soengq ndaej gijmaz, Nuengx baema gaej gvaiq.

Caenndang byaij daeuj cungz, Rox mwngz ndi lumz beix; Suenq nuengx aeu simsaeh, Ngoenzneix dauq daeuj caz.

Soengq nuengx daengz gizneix, Beix gag uet raemxda; Ndi soengq ndaej gijmaz, Nuengx baema gaej gvaiq.

Mbwk: Ciuh neix mbouj miz fuk, Nyapnyuk lae raemxda; Hoz caengz siengj baema, Ranz youh gaz lwgsaeq.

Mbouj un soengq gijmaz, Raennaj sim cix cuk; Ciuh neix mbouj miz fuk, Nyapnyuk lae raemxda.

Bae daengz seiq daih’ ngeih, Caez nyinh geiq doxcaz; Hoz caengz siengj baema, Ranz youh gaz lwgsaeq.

Sai: Aenhoj gaej yungh gangj, Aenvan gaej yungh lumz; Guhdoih daeuj lajmbwn, Caez doxcunz siuheiq.

Lwg yied ngoenz yied maj, Nuengx naih caj umj lan; Aenhoj gaej yungh gangj, Aenvan gaej yungh lumz.

Dingj gvaq ciet daihhanz, Mbouj nanz cix laebcin; Guhdoih daeuj lajmbwn, Caez doxcunz siuheiq.

Mbwk: Ndae coenz vah duh beix, Nuengx yied ngeix yied van;

Lwg hung cog hwnjbanj, Miz man liux beixnuengx.

Baengh mehbaj Genzrumz, Raeuz doxbungz ngoenzneix; Ndae coenz vah duh beix, Nuengx yied ngeix yied van.

Rumzbaek liengzyaya, Muengh daeuj ra rumznmaz; Lwg hung cog hwnjbanj, Miz man liux beixnuengx.

Sai: Nyaenx nae baenz yiengzbo, Nyaenx hoj baenz bohranz; Nuengx camhseiz souh nanh, Ngoenzvan youq baihnaj.

Seizlawz nuengx umj lan, Beix daengx ranz bae hoh; Nyaenx nae baenz yiengzbo, Nyaenx hoj baenz bohranz;

Daeuhgyoet dauq hwnj hoenz, Vacin hoengzbyambyam; Nuengx camhseiz souh nanh, Ngoenzvan youq baihnaj.

(sat)

Haeujdiemj ndaej song ndwen lai nanz le, gij ganbu sedui cungj ndaej daengz le “gaijfang”. “Seiq cing” guh sat gaxgonq, cienmonz aeu duenh seizgan bae guh fukcaz. Gak benq caeuq swnghcanjdui cungj nyinhcaen guh fukcaz, fatyienh miz loengloek, sikhaek gaijndei gvaqdaeuj. Veiz Gozcingh caenndang ciuhai baez hoihnaenghdamz niemhsou ndeu, dingq gij ganbu sedui caeuq gij daibyauij binzyacunghnungz naeuz yigen hawj “seiq cing”. Doeklaeng, gij vunz miz ginghci vwndiz haenx, bouxboux cungj nyienh youq gij gwnz caizliu ciemcoh.

Veiz Gozcingh dingz cozfungh guh hong daj saehsaed okfat, haeujlaeg sijsaeq, nyinhcaen fucwz neix, caeuq dingz guhfap “coj” seizde hingq haenx gig mbouj doxdoengz. Gij

anq “seiq cing” youq Liengzdzungz dingh haenx, saehsaed cingqmingz dingj ndaej hwnj lizsij gaujyen.

Youq Liengzdzungz guh hong “seiq cing” 9 ndwen nanz, Veiz Gozcingh cawz liux camgya vaisw hozdung, gij hoih youqgaenj caeuq bae gaijgez gij saeh gaenjgip haenx, itcig youq Liengzdzungz maeuqdiemj. Miz baez ndeu, de lizhai Liengzdzungz lai

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□Hoz Saubangj sij Cinz Siengzcouh Liuz Gingliuj Cinz Siengzgen hoiz

nanz di, baezde dwg youq bi 1964 ndwen 12 ndawcib daengz bi 1965 ndwen 1 ndawcib, bae Baekging hai Hoih Hong Cunghyangh caeuq Daihsam Gaiq Daengx Guek Yinzda Baez Hoih Daih’ it. Youq gwnz hoih Daihseiq Gaiq Daengx Guek Cwnghiez Baez Daih’ it, de ndaej senj guh Daengx Guek Cwnghiez fucujsiz.

Youq Liengzdzungz, Veiz Goz-

cingh caeuq gij bouxdaih wnq ityiengh, daj goek daengz byai cungj dangq bonjfaenh dwg boux vunz-guhhong bujdungh ndeu bae camgya cizdij guh hong. Daj ndaem goho, ndaem gofoed, cousou, rom bwnh, guh suiqli, ndaem faex caux ndoeng daengz cingeng, ndaem gyaj, ndai naz, sojmiz gij hongnazreih, de cungj camgya gvaq lo.

(caengz sat)